



Angallatit tingerlaatillit nunatsinnut tikikkaangamik isaaviup kingumullu nunatsinniit aneqqinnissamut isaaviup nakkutigineqarnissaat atatillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Laura Táunâjik, Siumut)

Qularutigineqassanngilaq matumani eqqartoratsigu immikkoortoq imaaliallaannagassaangitsoq. Isorartooruarnik sineriaqarnerput pissutigalugu aallartut tikittartullu tamaasa nakkutigisinaanngilagut aamma taamaattumik anngiortumik nunatsinnut eqqussinissaq taamatullu anngiortumik nunatsinniit annissuinissaq pisartussaapput.

Pingaaruteqarporli isiginngitsuusaassannginnatta, ingerlaavartumilli sapinngisannguatsinnik sulissutiguassavarput anngiortumik eqqussuisartut annissuisartullu akimmisaartinnissaat. Pingaaruteqarpoq inuit tamakku aarleqqutissaqanngitsutut misigisannginnissaat aamma misigisariaqarpat anngiortumik eqqussineq annissuinerlu ulorianarsinnaasoq.

Demokraatini tamanna tunngavigalugu iluarisimaarparput anngiortumik eqqussuisarnerup annissuisarnerullu pinngitsoortinniarnani Arktisk Kommando suleqataatinniarsarineqarmat. Pisarput suleqatigiissutigineqarsinnaappat pitsaassaqaq.

Tamatuma saniatigut innuttaasut peqataatinneqartariaqarput. Imaani angalasuuvugut aamma periarfissaqarluarpoq innuttaasup angalasuup takornartat umiarsuaannik angallataannilluunniit tingerlaatersortunik takusarnissaat. Taamatut pisoqartillugu ajussanngeqaaq nunatsinni akitsuuserisut kalerrinneqartartuuppata, tamatuma kingorna isummerfigineqarniassammat angallat tingerlaatersortuq takornartanit pigineqartoq misissorluarneqassanersoq. Aamma pingaaruteqarpoq akitsuuserisut attavigisarnissaat pasitsaassaqsimangaanni, nunaqavissoq angallatini atorlugu ikiaroorartumik hashimik assigisaannilluunniit anngiortumik eqqussiniartoq.

Aamma pingaaruteqarpoq oqaatigissallugu nunat allat suleqatiginissaat pikkoriffiginerulertariaqaratsigu. Pasitsaassaqsimagutta takornartat angallataat anngiortumik eqqussuinerlut annissuinerulluunniit atorneqartoq taava angallammik piginnittup nunaani oqartussaasut suleqatiginnaasariaqarpagut, taamaasillutik angerlamut apuukkunik imaluunniit tamatuma kinguninngua misissorneqarsinnaaqqullugit. Tamanna aamma akiuiniarnermut ilapittuutaasinnaaqooqaaq.

Taakkuugallarpoq Demokraatinit oqallinnermut ilanngukkusutagut.